

國朝畿輔詩傳

國朝畿輔詩傳卷四

長洲陶

樑晃薌輯

錢塘吳長卿更生校

楊思聖

思聖字猶龍號雪樵鉅鹿人順治三年進士歷
官四川左布政使贈工部侍郎祀鄉賢有且亭

詩

四庫全書提要且亭詩集楊思聖撰申涵光所
作小傳稱有且亭詩七集然不著其卷數此本
乃思聖既歿其子履吉所編凡詩八百餘首
其入蜀諸作刻意摹杜而刻畫之痕未化也
畿輔通志思聖任山西按察使老吏挾獄詞前
立挑燈披覽不三月了積獄三百六十案無濫
無枉招徠爲政使蜀當新開百事草創
首以招徠爲務綱舉目張翕然從之

魏裔介楊猶龍墓誌公幼有神童之目年十二
補博士弟子員己卯以鄉試副榜貢入太學壬
午中順天舉人丙戌成進士選翰林院庶吉士
已授編修纂修實錄陞修撰歷任春坊侍讀學
士尋出爲山西按察使陞河南右布政使轉四
川左布政使卒公天才雋妙風神卓絕尤工詩
擅晉人書法世祖皇帝方留心翰墨召
詞臣能書者面給筆札公所書兼幅獨稱
旨賞賚有加會
外互用公遂補外在山西讞決精敏累年大案
片言立解在河南攝左藩事草羨額給軍餉以
廉潔稱遷蜀蜀係新造土荒不治民與虎狼雜
處時又用兵軍需旁午通省權算歲入不過三
千緡公悉心綜理首曰募開荒立法盡善計增
額至數萬次曰招外商平削物價無有奇贏四
方擔負而至蜀漸復故凡四載入
袍服有差而病已甚矣公於詩抉開元大歷之
精髓明人中獨喜李空同何太復當冥搜放意
動恆天然入蜀以後益蒼茫蔚跂伯仲浣花生
平鑑別人倫接待寒素有若饑渴己丑禮闈拔

今侍讀學士曹本榮等二十八人先是公與永
年申涵光雞澤殷岳讀書廣羊山中後居九岳
每懷嚴棲之志及病亟殷生時在左右公曰我
爲庸醫所誤殆將不振沒後魂魄其依廣羊乎
太原有高士傳青主者精醫術若彼至或可救
殷生悼臂行力趨青主觸炎冒雨晝夜走千里
及至而公已沒公之知人能得士心也類如此
組豆樹館詩話柏鄉魏公嘗作五君詠首推先
生及蔚州魏敏果公一時稱爲楊魏其出按山
西也吳梅村學士送以詩云碧山學士起嚴裝
新把牙旌下太行玉塵開尊從將吏銀毫判牒
喜文章三關日落疑笳吹千騎風流出射堂憶
賜錦袍天上暖西游早拂雁門霜一天涼影散
鳴珂落木平沙雁度河北地詩名三輔少西風
客思五原多紫貂被酒雲中火鐵笛迎秋塞上
歌回首葉城從獵處千山殘雪滿漳沱後遷蜀
欲自投劾歸例外吏不得自陳撫軍羈留之遂
病行抵軹關卒且亭集近體多于古體五律尤
多于七律申涵光稱其俊音亮節上宗老杜近
比信陽王企靖稱其寄託深遠一往豪邁皆非

溢美故著
錄較多

秋夜感述

空院響梧桐夜永秋方半竟夕不遑寐沈吟坐成歎披
衣步前楹仰視明河爛初月出未高衆星縱橫燦南有
孤飛禽蕭蕭厲羽翰霜重儔侶失哀鳴如有怨苦被凡
鳥猜顧影自驚彈稻梁志已違鳬藻非所玩何當矰繳
收飛飛入雲漢

送黨大司農于姜告歸

知足志士懷盛滿達人懼自昔以爲訓白首乃不寤曠
覽懷前哲艷稱有二傅寥寥經千年此道不復著况當

天衢亨羣公正翔步華纓間朱輪照耀紛馳騫胡然遽
拂衣維繫不可駐征車旦夕駕僕夫儼在御賦贈滿詞
林尊酒狹廣路感彼道傍人三歎爲君顧日夕悲風起
驚沙卷高樹去去難重陳庶足慰遲暮

答周元亮

時以陳章侯畫見寄

長安無靜交車馬紛相望寸心各有營僂俛學揖讓嗟
我素心友遠隔蠻方瘴濶別已歲周延佇空惆悵何來
雙鯉魚緘書報無恙開緘讀素書暑盡寒溫况雅慕劉
簡齋清修秉微尚爽籟振金石孤吟發空曠如坐仙霞
巔聳肩聞高唱寄我篋中山突兀恣奇創烟雲儵起沒

巖角忽曠蕩髣髴來虛室章侯與元亮人生百年內役
役無善狀詩畫及友朋常苦不得當殷勤謝遠人斯義
誠難忘

寒夜

冬夜淒以長寂寞絕人境涼月薄帷幕荒庭交樹影寥
寥寒柝鳴熊熊孤劍冷擁被不成眠森沈萬慮永早歲
乏深智凌厲思一騁遂爲世網牽甘心逐蛙黽人生不
百年哀樂在所領貧賤各有適豈必勒鐘鼎愁來憶古
人見機苦不猛含恨當語誰淚下如修綆

卒歲感述

我有長恨端追此歲暮情朔風吹庭樹寒日照柴荆起
坐仰天嘆歸鳥飛且鳴吾生胡不達獨爲世網撏

冉冉冬日暮積雪耀林端負疴卧虛室慨然念微官家
貧祿復薄妻孥常苦寒况乏濟時畧終當歸林巒奈何
日微逐索米老長安

出門何所適落日見西山回望寸心違逢人多厚顏三
五誰家兒傳呼大道間貂裘控驄馬嚼齧黃金環出入
尙書第可望不可攀引領長太息歸來獨閉關

懷古

日夕登高臺云是昭王墓野雪蓋枯草不見征人路霸

圖既銷歇山河亦已故徒有黃金名千載令人慕

古風

豺虎性甘人狼貪固難移哀此蚩蚩氓蹙蹙安所馳機
深伏魚鳥山澤網罟施矜恤猶不暇况乃任恣睢晨興
理爰書涕下如漣瀾坐視不可救惜哉心力疲昊天有
明鑒殺人烏可爲

山行遇雨

栖栖苦無成中年嬰世務行役安得辭雞鳴懷往路陰
雨感天時險夷信所遇振衣陟重岡蹉跌無安步興夫
怨塗泥招呼何暇顧滴瀝聲轉急千峯起烟霧風來多

浪翻綠波飛鷗鷺山花隨意開瑣細不知數衆壑響驚
濤丁丁石橋渡牛羊下高巖樵牧隱深樹旅途雖云勞
亦復賞幽趣行行至前村燈火時已暮

入棧紀行

極望峯巒稠雲飛常沒頂空翠霑衣裳吹落澗谿影花
鳥亂聽聞心眼細細領晞陽射碧潭石粼碎光炯蒙龍
草葉陰樹老身戴瘿山鬼時一嘯蕭蕭毛髮冷前行隔
後行後嶺迷前嶺

戒途首茶坪跼步淩盤磴登登僕馬勞相顧色不定石
氣涼生雨亭午山色暝感歎發中懷何暇賞幽勝客子

多畏人履險憂踰登

山深四時殊六月麥未穫地瘠民苦貧終歲衣裳薄不知造化理于何齊美惡美者豈常妍富貴蒙丹腰惡者豈常嫌貧賤甘藜藿美惡天難問窮愁伊誰託

棧雲易爲雨朝行蒙霧露崖樹架連橋奔流澗石怒攀緣爭一罅坡陀馬足誤山禽鳴翠屏幽陰衆壑赴始知所歷高下見夜來路壯懷在馳驅漫自賦感遇

鳳邑萬山內城小帶砂岡草深鋤犁廢礮确石田荒居人盡健兒戶口半逃亡況復通秦蜀官差日相望喧喝盛氣勢錦衣坐當堂奔波縣令走驛吏色倉皇美酒間

大肉飽食身手強持符事橫索鞭扑多殘傷此輩工假
竊仁者宜慎防安忍見窮黎割肉奉虎狼

千峯萬峯盤鳳嶺稱高秀荔剝巖谷深終古雲烟淒淒
清嘯異禽斷續啼猿狄山果俯可拾雜花開錦繡何處
潛蛟龍崩奔雷霆飈百折未及半回首低羣岫峻嶒石
齒尖寸步苦難就嗟哉此險艱行人困馳驟安得煩五
丁手驅蟻蝶走魍魎不敢藏朗然見白晝突兀何時盡
鬱結使我疚

客子悲遠道旅途未遑安整裝凌晨發帶雨度柴關灘
石相激聒雲生暗峯巒步滑屢欹仄衣溼幾時乾強顏

國朝畿輔詩傳

卷四

六

慰僮僕談笑輕波瀾中情默自傷胡能駕羽翰

男兒生不偶辛苦遠行遊蜀道連天塹山川阻且修登
車抗前旌慷慨彈荆棘功名既有分亦不爲封侯所悲
同衆人白首老園邱浩歌懷古烈馬嘶風颭颭誰能乞
世憐永爲高士羞

棧深雷雨驕溪喧愁無寐積霖困荒村檐瓦墮風墜蕭
條晨爨艱恒饑色憔悴人馬雜坐臥相對發長喟起視
山頂雲縷縷生烟織重陰密難開惜此陽光闕

棧行苦未已終日歷崔嵬西登雞頭嶺喜見萬山開七
盤相撐拄石門雲氣來落景望梁州川原繞城隈不復

憂顛墜暫得避喧阗寸心稍慰悅故鄉安在哉艱難蜀道遠哀歌首重回

遊玉峯

閬南玉峯危獨立諸山遠曲折抱河流回回巖谷轉凌晨果茲遊沙石亂清淺登頓披蒙茸蹴踏屐齒緩呀然天闕開羣壑俱在眼錦屏西如朝雲氣互晦顯古殿稍輝煌歲久積塵滿恭惟上帝尊像服猶冠冕最後孤頂圓峭絕昔誰刻相傳璞壁藏欲採苦深緬下望見江村人家散平衍戶牖蔭桑麻花竹通雞犬尙想堯舜時飲食恣衍衍奈何戰伐仍干戈到魚鰾門多縣吏跡夜黑

聞賊歛盜賊胡能定鬱紆愁未展放懷委林邱佳境從
斯踐

登城觀江漲

長峽古誰鑿險勢闢閭閻崖東下急湍萬壑爭奔放潯
雨重陰積半夜聞江漲驚響闕雷霆陣馬鳴甲仗晨起
兇危矚目盡波瀾壯杳冥衆山浮城郭恣汎瀆崩石頽
岸沙千艘不得上在昔此川水吳楚舟相望羣流會夔
門瞿塘如搯吭千里片時間哀猿叫疊嶂何當靖寇盜
深谷見滌蕩舳艫接東南絡繹看轉餉飽聽竹枝歌競
學榜人唱乘興過荆襄擊楫破巨浪倏忽通往來布帆

欣無恙

送王邁人分藩江右

落葉千山肅分飛鴻雁鳴如何在異鄉茲晨送子行霜
露被征衣寒林多悲聲執酒立斯須對酒不能傾我聞
潯陽水江流九派清匡廬勢吼淅隱處惟孤貞奇草徧
巖谷服食可長生青雲日以馳白髮日以盈安得脫塵
網相從採芝英

春郊行樂

負疴四運周久臥積重陰今晨天氣曉和氣吹我襟息
訟朝行樂駕言適水潯雜英覆芳甸麗日耀層林谷靜

嘉禽集參差弄好音遊子感時序遇物成悲吟榮名復
何事素領忽見侵嘆息靡家室悠悠滯余心

爲丁野鶴題重逢羅漢卷

白描虛傳羅漢像古今幾人稱心賞公麟已沒章侯死
畫手徒多祇鹵莽我觀此圖真奇古經營毫髮皆可數
綻衣幻作蜃樓雲飛錫倒連滄海雨洪流汨汨旃檀香
老龍夜吐明珠光水精魑魅盡辟易翠蓋靈旗時渺茫
憐君自是再來人靜修白業種佛因暮市遭逢雙眼碧
泥塗一紙見前身攜君手爲君題精爽颯颯日已低相
期共結青蓮舍杖履常隨明月蹊

放歌行贈崔興我

督亢陂邊沙浩浩昭王臺上空衰草
擊筑難尋舊酒徒拔劍哀歌天欲老
崔生崔生謫仙儔一飲一石不能休
心輕黃金如糞土常將白眼對王侯
昔年驄馬氣如電揚州視聽誰不羨
一朝歸來祇敝裘蕭索翟門無人見
惟我與君最相親得錢沽酒不辭貧
脫帽露頂復大笑人間毀譽等浮塵
只今持節向安廬許寄毛家一簞書
丈夫相知在然諾天涯雖隔猶比閭
執君袂把君杯眼前同心能有幾
身後榮名安在哉奈何不醉徒徘徊

雪浪石以予瞻得名魏石生年丈雪後望西山曰

此雪浪山也作詩屬余和之

亂石槎枒古北口怪雪吹山山勢走千巖萬巖何夭矯
天吳鼓鬣老魚吼絕似層冰結又如碧海移耳邊已聞
驚濤怒眼底常見堆琉璃蒼虬蜿蜒數百里噴珠濺沫
鞭不起中有雲氣隨變化晶光騰掉鱗甲裏昔有髯蘇
氏得石名雪浪卽以顏其齋作銘坐相向吾友石生更
好奇每對西山發浩思雪後迴視忽大叫高懷應許子
瞻期風塵瀕洞道路艱泥污車馬滿市闌安得攜手住
岩間刷藥餐霞弄潺湲來往空明豁心顏

送彭燕又旋里兼訊顧偉南

光熹之際龍在野人文往往歸復社當時陳徐最知名
君也犄角不相下十數年間歎沈淪俊及廚顧俱埃塵
短衣破帽子尙在流落誰悲失路人去年上策復不遇
憐才難買千金賦狂歌日沽燕市醪痛哭屢弔昭王墓
愛我時時肯一過酒闌擊劍客顏酡人生感激爲知己
抒心寫意豈有他送子七月涼風早蓴菜鱸魚秋正好
到家爲問顧偉南他日相逢漫草草

雪樵子行

昂藏七尺雪樵子浪迹金門飢欲死十載栖遲守一官
不堪重問少年事少年意氣頗不羣共羨作賦凌青雲

縱橫豈屑秦王父指顧常輕霍冠軍交遊盡是天下才
置酒論文登高臺屢欲將身獻

聖主手拯蒼生

何雄哉物換星移陵谷改相看無復舊顏在著書誓擬
老吾廬採藥頻期入滄海偶觸世網困風塵敝裘羸馬
走踈踈自憐不是公卿舊且復低頭隨衆人懶慢從來
不同調強學磬折何由肖婆婆每使長官嗔蹭蹬微聞
僮僕笑以此感歎獨閉門蕭條謝客負朝暄一歲苦吟
詩一卷眼暗手皴雙鬢髡君不見潯陽陶元亮囊懸乞
食猶無恙罷官彭澤乏酒錢黃花滿把坐相向又不見
浣花卜居叟離亂衣衫露兩肘朝移西瀼暮東屯旅病

年年艱升斗歷觀古來達人高士大抵皆如此況我才
疎已老飄雪樵子爾何癡郭外有田牀頭有醪遠屋青
山雲纓鍵當階流水竹離披何如早歸去耕爾田啜爾
醪登山臨水讀書彈碁胡爲汨沒名利場魚魚鹿鹿下
氣低眉黃金不可聚官高亦足危以窮以老安足悲

送人入蜀鎮幕

中原雲擾爭逐鹿奔走下士競車轂整頓往往歸異人
豈能憔悴老山谷羨君年少迴出羣翩翩意氣美而文
紫駟飛轡致千里白袷談兵驚一軍上書曾邀

天子顧杖策西出羣叢路諭蜀爭傳司馬文登樓漫擬

仲宣賦憐余薄宦歎飄蓬愁病獨吟一老翁相逢傾蓋
如舊識時時慰藉旅途中江城春早寅回斗梅花爛醉
嘉陵酒野寺行人送夕陽山亭弔古圍衰柳卽今經歲
苦南征烽烟滿地哀笳鳴君去莫惜箠中箭爲我一矢
下聊城

酬王邁人見懷之作

梅花已落杏花吐庭樹春禽兩兩語微風一夜吹草堂
曉來獨看屏山雨珍重裁書寄數行淋漓佳句墨痕香
烹茶正欲聞清話泚筆頻遲作報章憶昨追陪成造次
朝飲江頭暮佛寺相別不覺動隔年車馬雜遝非我志

平生快意幾能酬况予與君同宦遊
嶺雲溪水徒勞望子規聲斷使人愁

苦雨

巴蜀多山山雲屯十日五日雨聲頻
竹籬塌壓連墻倒鵝鴨喧闐惱比鄰
經旬不出閉門坐簿牒沈綿愁無那
碧草青苔緣階生鵲鵲鳬鷺交相賀
驚聞街頭米價高民窮難免衆嗷嗷
稻畦淹沒豆苗晚耕種誰憐終歲勞
况復夔州尚苦戰轉粟如鱗常恐玩
幾時兵罷雨亦晴閭閻沾酒賣釵釧

己丑除夕

臘意中宵盡驚心事事違暗知筋力異漸覺宦情非燒
燭留殘燼開簾待曙暉闌闌憎巷鼓旅夢不能歸
行藏難自料漸老歲華侵孤枕他鄉夢兩年今夜心笙
歌喧薊北烽火接山陰萬事蹉跎裏無勞問陸沈

寄懷南亭諸友

一從辭舊社卻悔廿年心薄暮無知己中宵思故林亂
離荒夢隔烽火雁書沈爲報枌榆子名山好共尋

歲暮感興

難從季主卜羞自判行藏廌久移風土官閒愧稻梁鄉
心侵歲切旅夢隔年長徙倚空庭暮昏鴉背日黃

金山寺

峭壁開初地中流瞰大江
濤驚逆石走佛怒喝潮降
雲水閑僧榻龍雷護法幢
青蒼望不極終古自淙淙

宿山寺

曉鐘投野寺客意憚蒼涼
巖壁禪燈暗花龕佛火荒
盤藤懸古月老桂發幽香
幸就山僧榻塵緣得暫忘

野眺

凭高不可望暝色斂寒空
湖濶吞天日霜稠亞樹紅
平沙閑宿雁荒徑響秋蟲
故國音書杳雲山無路通

遙題陳鍊師紫芝山房

天宇盡沈沈清齋見道心鶴盤松樹古泉聒翠微深石
氣封丹竈秋風動玉琴金芝尚可覓不敢戀華簪

送宮紫元南還

十年纔一會戀別惜杯殘落日江湖濶孤帆何處看冬
風吹劍冷凜雨觸衣寒預想還家夜閒堂夢乍安

寄申晁盟

愁思風雨夕忽幾十年過會否狂如舊將無鬢已皤君
才豈飄落吾意亦烟蘿出處誰能識悲哉兩地歌

夜雨

官冷閒於寺幽居不近名挑燈尋舊緒聽雨坐深更暗

歸低龍氣空堂度雁聲興來何所事午夜有詩成

次宋玉叔雨中過訪見投原韻

齋居無一事留客此茅堂風雅名難副烟霞道未忘披
帷來細雨敲竹散空香待到秋期近移尊泛月涼
衝泥君肯出走馬到堦欄坐覺千峯秀談深六月寒美
名應自惜好句與誰看落落風塵裏能無愧一官

喜申臯盟至都門

意外勞相訪秋風人正閒喜深無一語驚定始開顏款
款悲雙鬢遲遲話故山長安非昔日莫畏鶴書還
不堪今夕會重憶亂離初人老干戈裏交存生死餘山

川幾命駕涕淚共裁書十載還耕約相看愧鬢疎

望極燕山暮相逢感泣多人間遺玉腕故物指銅駝恨

血千年碧

甲中素園先生死國難先

龍池永夜波雄圖今已矣尙有

酒徒過

秋懷

秋城餘返照霜色淡遙峯落葉空齋掩蕭條聞暮鐘客
情隨宦減生事逐年慵兀坐遲今夕懷人何處逢

送申臯盟并呈殷伯巖

幾月依燕寺蕭條客念歸送君懷往路昨日雪花飛
北連沙戍漳南老蕨薇寄言殷伯子招隱故心違

山信

歲序冬逾駛，栖遲未得閒。
邊風吹碣石，大雪滿燕關。
濁酒堪扶老，黃金豈駐顏。
年年山有信，招隱幾時還。

卒歲感懷

生涯今莫問，何事老長安。
花鳥催春近，冰霜逼歲殘。
漸看容鬢改，轉覺宦遊難。
寄謝寒梅發，窮愁賴爾寬。

早春

流年何太劇，春事早相尋。
車馬征人路，鶯花故里心。
暖烟回遠陌，晴日散遙林。
翹首憂偏切，誰堪拄杖吟。

生事還如此，閒門畫不開。
夢隨池草發，春逼雁聲來。
貧

病從吾好迂疎任世猜芳時容易度肯惜盡餘杯

寒食

風雨長安路淹留客計非閉門傾濁酒寒食換春衣深
巷烟初亂鄰家花又飛十年官舍冷何處夢漁磯

春日閒居雜詩

人間天意靜幽興滿吾廬藥銚春晴後甌香午夢餘尋
山常愛畫懷古贍翻書只此堪容懶浮名漸欲疎
老眼拚花放衰顏劇酒紅人情隨地異春色故鄉同散
秋容狂子乘時有數公生成造化力何必泣途窮
淹蹇爲郎久生涯竟若何燕泥增舊壘庭木發新柯應

接午眠減擲春夢多空慚招隱地高士滿山阿

寄懷李言本兵備

雲中連朔漠檠戟欲臨關落日邊笳靜春風戰騎閒登
陣懷古烈舞劍壯顏顏獨有書生誤金門鬢欲斑

送家弟臨三鄉薦後歸里

還家初得意此去有逢迎磊落真吾弟栖遲愧爾兄青
雲輕少壯薄俗重科名方羨驂騑異終看萬里行

搖落

沈寥天氣靜風景起離憂雁叫龍沙月霜飛鹿塞秋短
衣垂老淚遠夢結鄉樓萬事同搖落憑人呼馬牛

冬日閒居

曙窗驚客寐，羣動各蒼茫。
犬吠寒城柝，鴉啼早樹霜。
婆娑身易老，羈束興難狂。
夢斷梅花信，清宵淚滿牀。

關山月寄宋玉叔兵備隴右

爲憶關山月，征人幾度看。
不堪悲玉塞，何處夢長安。
影亂黃榆冷，秋生畫角寒。
男兒期報國，清嘯漫憑欄。

秋感

上書悲樂毅，結客感燕丹。
易水河流咽，高臺草木寒。
那能憐駿骨，空復憶危冠。
萬憤填胸臆，時時把劍看。
惆悵前朝事，秋來思不勝。
青山園故國，白露下諸陵。
禮

樂存遺逸興亡間老僧異時誰載筆涕淚傳衰口
秋聲何處至一夜送寒湖月暗蠓螾塞雲沈蟬竦橋深
巖棲老衲古木響山樵此意無人識空齋客夢遙
破悶惟耽酒傷離不廢詩暫須依薄祿未可怨良時雨
雪孤臣淚關河旅客思那堪風景暮淒斷使人悲

出都宿天寧寺

襆被倉皇去黃昏入梵林鐘聲清客夢鈴語喚禪心雨
雪都城暮風霜驛路深何時征蓋息復此得幽尋

過金粟寺

寺爲故晉藩園

暫喜辭塵務今來禮梵宮慈雲敷貝葉法雨響松風跌

坐諸緣幻觀身萬累空名根終未了遮莫泣途窮
地是王孫造名因浩劫留園花資佛力畦藥足僧謀落
日千峯迴汾河一線流登臨真不厭髣髴識椒邱

出太原

悵別并州路還看似故鄉一年愁與病遠道雪兼霜簿
牒憎人面山川潤客裝無嗟遊宦苦不減舊疎狂

雪霽山中曉行

惡興資遠眺曙色指朝暾春雪雲邊寺孤烟山下村殘
鐘驅客夢冷雁喚征魂何似林居子高齋尙閉門

下太行望清化鎮

晉豫猶同壤喧寒一嶺分村籬圍竹樹隴麥覆春雲倦
馬嘶隄柳征人看雁羣平原堪縱目不覺至斜曛

送周茂山歸四明

不敢留君住知君有老親門前黃葉樹江上白頭人負
米休慚祿烹葵莫厭貧甲兵天地滿何處好爲鄰

晚行田家

野澗通征騎村低帶落霞雞棲農事靜牛飯夕陽斜秋
露滴禾黍天風吹豆花他鄉時序好何用苦思家

遊百泉次韻

不謂風塵客相從到百泉山空疑作雨林密欲爲烟亂

石當樵路平流散渚田薄遊堪取醉好向水亭眠
登頓勞心目如從畫裏行松驕盤石險雲靜蕩波平孤
嶼探菱唱深巖伐木聲低回幽興愜得句不書名

題孟陟公高齋

無復風塵到蕭然處士家翦藤閒潑墨燒竹夜烹茶世
路何須問浮生自有涯兒童能解事埽徑報飛花
朴畧高軒爽幽尋自往來畏人雙戶鍵愛客一尊開聽
雨留殘竹行歌餞落梅卜居何地好爲汝獨遲回

同翁藏若馬芑史何仲端李簡臣梁曰晉遊超化

些

峭壁千尋上人家已定居春秋遵漢臘雞犬是秦餘堂
豁堪娛老山深好著書一椽如肯借不異在吾廬

少林寺

古寺雲深處山圍面面峯鳥鳴金澗竹風落翠微鐘斷
碣封蒼蘚長廊倒怪松往來看不厭昏黑更扶筇

登華山

絕頂翛然上身輕漸欲飛天風吹竹杖嵐影溼仙衣歲
久黃精老山深紫蕨肥憑虛諸念滅猿鳥本忘機

茂陵

寂寞高原上踈風禾黍哀豪華追往事拓畧想雄才封

禪終何益神仙竟不來可憐民力盡遺恨在輪臺

龍山寺明睿藩所建報恩院也老比丘猶是分封
時與攜者自言行腳漢南已四十年矣龐眉白
首每話前朝事輒爲潸然也

帝子今何處兵戈苦未消龍歸存浩劫僧老話前朝杖
履風雲暗江山涕淚遙焚香慚報國白首望青霄

漢山感懷

漢南猶未定兵亂見蒿萊雨漲蕭何堰風高韓信臺江
山銷霸業日月老雄才底事龍川水東流竟不回

觀音寺

古寺臨山澗門前積翠重一燈然密室萬壑落疎鐘
劫盡佛恩見雲深僧路逢誰能空世務來此訪幽蹤

遊錦屏山

山盡飛黃葉登臨感客情寒城朝日色空谷大江聲
家遠驚烽火林開見耦耕興來頻竚立拄杖一身輕

悼馬

遠道誰相伴長鳴爾獨親艱難關塞濶遲暮雪霜頻
病骨埋荒草征魂託主人

馬走死棧中
先一日見夢

風塵騏驥少老淚

欲沾巾

轉戰

轉戰幾時定驚看羽檄馳千山鳴畫角萬竈冷晨炊川
北徵輸急滇南消息疑不知諸大帥何以慰瘡痍

十五夜

門閉不成歡蕭蕭坐夜闌春星低院曙明月近人寒客
市聞燈夜鄰家聽曲殘殊方餘此夕重覺別離難

春日項永伯招飲

選日歌筵敞園花幔帳開天涯朋輩合春色故鄉來薄
醉霑燈影輕寒護酒杯盡拚今夕賞莫問晚鐘催

得周茂山書

與子相逢日攜遊笑醉歌一年棲代北三月渡黃河別

後同吟少書來昔夢多歸期如不負未敢恨蹉跎

得紀伯紫書卻寄

悵望故人信春風鴻雁初經年巴峽客隔歲秣陵書杖履身應健江湖願豈虛昨來頻送警高卧定何如

聞城春望

客眼登臨豁山山入望蒼江沙連岸草春水上城牆雲暖玉臺碧風輕閣苑涼依回憑眺久忽覺在他鄉

東程石公

與君俱有意相對且吞聲虎豹天門險山川蜀道平年衰資藥裹才拙斷逢迎欲其峨帽隱安禪老此生

贈于念劬

處處窮途淚休嗟蜀道難身閒從策杖俸薄笑加餐故
國雲山渺巴江花鳥殘風塵知已在何必說彈冠

題畫

萬峯行不盡客倦欲黃昏古路三叉口斜陽老樹村風
鳴山大吠澗黑夕鴉翻寂寞成孤坐憑誰具酒尊

瓜州守風

芙蓉露冷暗香銷仗劍從遊客路遙落日人歸京口雨
孤帆風打廣陵潮大江水濶魚龍會澤國秋聲雁鶩驕
擊楫祇今誰士雅白頭空自老漁樵

寄懷殷伯巖

策杖同聽山寺鐘幾年相憶采芙蓉歸田真見陶元亮
入洛虛傳陸士龍薄命一官仍短褐狂遊五嶽有孤筇
廣羊石室依然在他日芒屨許再逢

漫題

寂寞雙扉晝不關每臨書卷一開顏才疏未便文章誤
性僻偏宜禮數閒華髮初生慚北里名心漸冷夢西山
長吟漫訝交遊絕抱膝猶堪自往還

得周元亮書卻寄

搖落江湖鴻雁踈聞天消息近何如殊方不隔秋原夢

萬里驚聞嶺外書慷慨誰人同患難
兵戈滿地歎居諸
曾聞白下堪謀隱忍死還來共結廬

西安懷古

草色淒淒滿漢宮山川憑眺杳難同
金莖朝渴仙盤露
錦鏡春收畫鷁風古道重來迷渭水
行人何處識新豐
驚心城闕蕭條暮落日寒烟恨不窮

春興

花飛二月徧林泉客况清和萬里天
錦水晴沙明浴鷺
巴山春雨過啼鵲移書自愛支茶竈
沽酒何慙解杖錢
莫使離愁侵病骨他鄉物色倍堪憐

晚春卽事

花落閒庭春事闌
主人長日但加餐
竹間路好披雲入
窗裏山宜帶雨看
半篋殘書留過日
百年衰鬢罷彈冠
蕭條莫厭交遊冷
逆旅悠悠蜀道難

漫興

浮名萬里笑遲留
旅病經時漸不憂
載酒偶然逢客話
看山遲日上僧樓
白雲千嶂夕霞亂
紅樹一江清露流
瀟灑微官隨去住
閒身此外更何求

昭魏石生年丈

相見何禁感慨頻
應憐拙宦久風塵
身名肯使慙知己

尊酒重來對故人里巷烟霞還似舊長安花柳幾回新
迢迢又逐征軺發敢擬高眠伴隱淪

上谷道中

上谷蕭條古塞垣居民戰後幾家存門連青草朝烟冷
風走黃沙曉日昏獵騎臂鷹穿巷市健兒飲馬下河源
不堪少小追遊地老大重經欲斷魂

題畫

幽徑蒼苔滿秋山黃葉賒騎驢吟正穩不覺夕陽斜

見山堂秋曉

曉起坐空堂寒花垂白露科頭懶讀書閒寄籬邊樹

國朝畿輔詩傳卷四

終

國朝畿輔詩傳

卷四

國朝畿輔詩傳卷五

長洲陶 樸冕薌輯 寶坻高繼珩寄泉校

郜煥元

煥元字淩玉號雪嵐長垣人順治三年進士歷

官湖廣提學道按察司僉事有猗園存笥稿

長垣縣志煥元明吏部主事獻珂子幼穎敏十
歲解屬文十五補博士弟子員十七舉於鄉順
治丙戌成進士授太原知縣泣任首葺城垣無
何有姜逆之變所在陷沒煥元集衆歃血誓守
賊合衆來攻竭力防禦身不解甲者七晝夜會
大兵至殲寇於晉祠以功陞刑部主事未幾擢
湖廣提學道按察使僉事至則正文體絕請託
所拔率成名士甲午鄉試自元魁以下凡得售
者九十三人一時傳爲盛事請告歸年纔三十
餘間居奉親栽花蒔竹閒遊秦晉齊魯大梁吳

越間所爲詩古文辭極多與鄧州彭而述益都
趙進美萊陽宋琬遵化周體觀永年申涵光陽
武趙賓稱江北七才子著有
猗園存笥稿數十卷藏於家

送別宮紫二

十年讀君書今年見君面坐此長松下芳草鬱幽蔭英
論薄層巔曠懷明飛練憶余垂髫時君已南宮薦才藻
誇凌雲共倚匡時彥中道竟陸沈高蹤託述撰芳華思
令人山川日悠緬一尊得快游擊筑同燕旬孤桐發清
音佳人成婉孌所嗟歲序馳淒淒悲霜霰秋雨被遙岑
遊子懷江縣駕言返初服海水日激濺丈夫感意氣軒
冕誠足賤故人知我心不隨風雨變含情戀佳期終思

借歡讌

歡讌不可期別離忽遠道北風蕙草微江雁歸胡早羈
人感物候淒惻傷懷抱厭此車馬塵谷彼林中好秋雨
范平用江鄉足粳稻獨坐理清商嘯對海門島遐矚萬
象中奇書肆幽討春雨草堂開落杯星石倒淮水送鯉
魚詩來慰枯槁伊我胡滯淫索米徒草草夙昔同心人
倏忽隔涼燠輕帆指潞河岸岸芙蓉老志士貴遠心愚
者多悞惱黃鵠有羽翼萬里遊浩浩慎此金石顏容輝
常自保

送別曹持遠比部

同是長安客出入供司寇我歸八年前君歸八年後荒
城稟歲嚴一尊感故舊本非逢世姿落落何辭詬夙昔
窺家學時代綿華胄咳吐古人風藝苑擢神秀高才反
見黜長揖謝朝右匹馬下長河賦雪梁園就春色變河
橋高柳明岩岫新人若不知故人若不救擁志歸吳山
僕夫催何驟臨別寄瑤華珍重此懷袖

魏雍伯招遊鹿泉諸勝

跨馬出西郊倦眼豁疎放遠景帶日斜清遊恣元暢秋
氣下蒼崑空翠殆難狀同行得佳侶泉石激微尙行看
巖岫舒坐愛流漉漾瞻眺韓侯祠英風颯甲仗剝蘚讀

殘碑寄興忽悲壯迴望羽人居丹棋絕壁出虛洞有雲
封老樹爲之障急雨溜層巔攀烟遵複嶂初尋鷲奧奇
逕轉得平曠中有龍象藏丹碧鬱相望微步愜幽尋陰
洞何年創嵌空入杳窅白日劃光亮造化鍾靈異神工
非意匠鼎鑪號連珠透闢絕依傍冰雪冷然入披襟爲
神王空亭延翠藹日暮欣跌宕生平邱壑心對此樹高
貺願得休糧居乘風采澗沆

楊使君署中贈袁杜少

我坐使君屋讀君修竹篇怒螭盤空壁氣勢相蜿蜒透
迤數十句變化如雲烟列宿羅胸中腹笥何便便我欲

揚風雅對君感朱絃肅心窺元化微茫慎所宣建安與
黃初徽音賴以還靡靡齊梁體噍殺不足傳漆水挺奇
傑早歲恣騰騫驕驕逸步一日徧八埏行矣振北軍
拔幟登其先

走筆別程伯建

前年別城之隈今年別江之澣黃鵠高騫野鷺翔蒼龍
蜚立瘦蛟舞沙洲烟草路茫茫櫻筍泥鞦九日雨歐長
卿李雲田偕子同來送別船別船日暮芙蓉老滿酌清
醑問秋昊相逢意氣感鬚眉二子不言子更悲昨日上
書不見收低頭幕府終何爲聞君杖策向長安水落桑

乾木葉寒黃金誰薦中涓馬易水空憐壯士冠君不見
郎官湖上李白遊至今魂魄尙堪留又不見蓬荆深沒
楚王臺陰雨啾啾鬼夜哀登祝融望吳越我欲扶筇鼓
柁上八萬之天台探千年之禹穴安能俛仰隨世網蟻
牛文身入廟遭羈紲

雨中同崔瑛媼醉飲

黑雲垂垂壓清晝暑雨空林來何驟崔郎騎馬衝泥來
共倚湘簾看簷溜須臾返照出其裏玳瑁千層落盃底
元蟬咽咽露初零故鄉明月沈秋水幾年阻隔湘衡面
動如參商不相見此時解綬賦歸來坐開桑落偕親串

回思廿載蕭門道我輩紅顏各年少君家兄弟盛聲名
我亦當時附文藻只今零落感晨星聚散人生胡能保
揚雄著作等覆瓿屈原放逐由草藁古人行樂貴及時
轉眼韶華驚醜老君不見青燐夜泣黃金臺昨日驪裊
今蒿萊又不見黃河新起瓠子宮萬家城市走蛟龍眼
中世事已知此更闕燭盡角聲起君今不醉胡爲爾

中秋無月柬王幼輿

去年我在燕山北有月無酒常偈側今年我向故鄉來
有酒無月罷登臺露雲送雨晚細微颯颯天風吹我衣
張燈促席開南樓樓外蛟龍攫月遊遙夕沉吟坐夜闌

關山笛裏憶長安噫嗟嗟怨離別滿眼愴浮雲海烟幾
時滅幾時滅我心悲人生去住各難料來歲陰晴未可
知呼兒且進酒覆我掌中卮安得王郎拔劍斫地歌開
我萬古磊落抑鬱之襟期

送韓石華北遊

崑崙東折走中流中嵩拔地亘崑崙千年再產韓荊州
文章八代繼前修十載栽花東海陬一日聲名動九邱
華胄遙遙盛箕裘中有長公聲最優身長七尺髯且修
五嶽方寸罕其儔萬谷胸羅恣冥搜元精耿耿開雙眸
一朝晤我河之洲五月招提醉石榴拔劍斫地勢更遒

典附落紙如琳球杵白論交意氣稠卻憶當年淮水舟
君家大阮共登樓羣盜如毛罹百憂前有黃狐後鵩鷗
聞雞中夜誓同仇白日西匿不可求良朋一散二十秋
與君相對倍綢繆高城落日酒無籌平原遂作十日留
漫漶一刺向誰投彈鋏歸來仗蒯緱匣中風雨吼蒼虬
悲歌起舞響箏篴聞君明日京洛遊黃金高築碣石幽
左攜腰裏石驪駒珊瑚連錢飾絡頭伯樂一顧中涓收
臨行送子勸吟甌胡以贈之雙吳鉤鵬鵬光寒星漢侔
薊門八月風颼颼赤霄萬里縱彘猶孔翠豈同燕雀謀
咄嗟世路又何尤我今投老事勑擾綠疇南陌聽呼鳩

他年遇子動鳴騶好訪青門問故侯

贈盧子

暑雨鏗鞳衝河角客子襤褸遊將倦我友招尋邵侍御
倉卒遂識盧生面盧生蚤歲蜚英聲鍵戶下帷破萬卷
我父東國舊掄才摸索幾擬雄文薦清宵剪燭竟何人
感士不遇空戀戀一朝進士有七人明珪美璧咸國珍
中有邵子更絕倫自言與君情最親高論時時迴天地
哀歌往往動鬼神論文未擬等覆瓿撫事只應歎積薪
今年我向濟州來把臂深惜國士才纔言古道眉先動
卽論往事心誠哀千年重睹元都觀百里猶傳單父臺

二十年中堪回首悲歌幾醉任城酒文章遇合君能致
富貴自分余何有杜甫池邊柳已青太白樓頭月如斗
浩歌仰視浮雲白相對無辭杯在手盧生盧生真堪友

晚登晴川閣

傑閣初登眺千帆入杳冥水吞三面白山截兩峯青地
坼連吳楚潮迴辨日星憑闌閒指點一棹下烟汀

將赴湖南晚渡漢江

一葦江烟破迴遊指郡西汀花隨岸小漁火帶星低水
氣雜霜露客心悲鼓鼙坐看王會遠萬里下雕題

荆門舟夜

天高明野電夜靜倚官舟
戛火荆門接霜星楚岸稠
山河留霸氣詞賦待名流
寥落千年事蕭蕭蘆葉秋

夏人叔從禹峯先生爲湖南之遊

之子湖南去扁舟意若何
白雲衡嶽滿青草洞庭多
幕府裁鏡山遷人依棹歌
只愁揚子宅蚤暮少經過

草檄眞能事從軍亦壯遊
况逢漢陸賈同註晉陽秋
雨幔臨湘浦風帆近岳樓
賴君傳古蹟賦歷楚江頭

送姜鐵夫南歸

白首家無定青山爾又歸
京華詞客賤秋雨故人稀
鐘動催霜葉潮平載夕暉
鑑湖南月好爲我選漁磯

申臬盟見訪

自枉高人駕悠然淡旅情
狂真疎禮法老益厭詩名
萬樹霜前色連砧苑外聲
鄉心劇歲晚遲我碧山耕

訪趙錦帆於報國寺解官南歸悵然有懷

白首官仍謫黃河客竟還
春明無故舊秋色冷鄉關
葉落松房定風吹海月閒
蘇門歸倘遂同釣碧溪灣

故城舟夜

野泊風帆定空舟夜氣遙
暮烟沈古寺孤月湧新潮
鷗鳴何急黿鼉夢不驕
荒墩吹畫角東國正蕭條

送長益南還

江湖君又去京洛少知音故里三年約扁舟五月心危
途淹老驥暮雨滯孤琴歸到金焦日秋來夢已深

晤張海旭

尙記南奔日艱危借一舟孤帆淮浦月百戰島門秋身
世還青眼山河竟白頭草堂尊酒在萬里慰離憂

寄遜山子

別後俱多難歸來獨可憐興吟吳苑草淚盡郢門烟萬
事還鄉并孤身歷歲年白頭新賦草零落竟誰傳

江上逢黃坤五太史

白髮承明舊侍臣天涯淪落晚堪親篋中歲月存詩史

世外江湖有釣緡往事傷心辭洛日他鄉垂老避秦人
開元朝士君仍在聽到宮詞淚滿巾

贈大司馬河使朱公梅麓

詞臣八座下明宮水土兼傳仗鉞功遂使黃龍歸故道
不教白馬怨秋風艤艫歲月春流外羽獵山川輦路中
啟沃願參還省閣車書萬里正朝東

赴東壑遙望五龍雪色

徑行初日千峯上俯瞰蒼烟一郡西朔塞天連三晉險
晴空雪壓五龍低山腰拾級樵爭入樹杪盤雲鳥亂啼
萬壑鄉園吾獨往嶺猿溪月待幽棲

贈彭禹峯先生

揚舲五月下蠻方
醉踏江樓草色長
公子椒蘭新七澤
將軍裘帶舊三湘
君從絳幄論前輩
我向青雲認父行
萬里長纓須蚤繫
漢家將相本南陽

貴池舟中遇顏乃來太守赴荊州兵使

高城雲木隱汀洲
太守船回卜夜遊
畫舫移尊天上坐
青山歸夢雨中愁
嚴關晝壓孫權壘
古堞晴生蕭統樓
望裏八州防禦遠
早傳清嘯滿江頭

贈李將軍戍楚

鐵衣十載臨戎日
尙憶圍城轉戰功
射虎未聞封李廣

雕蟲猶復困揚雄
千羣代馬悲笳裏
獨戍江湖險塞中
氛祲扶桑憂不細
捷書蚤寄楚天鴻

王幼輿以近詩見貽卽有禹州之遊作此奉送兼
致懷兵使沈繹堂

閒門盡日補烟蘿
竹裏逢君有嘯歌
一卷詩纔傳白雪
三春客又渡黃河
風歸禹甸山川麗
路入梁園詞賦多
好問故人東郡長
樓中八詠定如何

晤李梅臣時以病持戒

卜鄰猶喜近鄉關
十載浮雲故國顏
放後幾人無白髮
歸來此地有青山
高城夜雨薜蘿隱
獨樹閒門烏雀還

見說長齋能事佛維摩丈室許誰攀

送張爾成赴召

出使十年今赴召班行應睹漢儀新
名高館閣推前輩國有安危屬大臣
飛輓山河迴驛騎嚴裝衣履上星辰
鳳凰臺側麒麟閣還讓螭頭第二人

己亥九日

搖落空亭菊自花東籬斗酒尙堪除
百年雙鬢秋方暮四海重陽客在家
漠漠山城催落葉陰陰江雨送鳴笳
干戈南北無消息悵望高天獨雁斜

盧溝

盧溝橋下水盧溝橋上月水月無斷流行人去不歇

楊白花

二月楊花青三月楊花白不見遠行人飛入遠行陌

示裴臣

春雨茅堂長綠苔閉門閒看碧桃開雲亭寂寞無人問
只有候芭日日來

漢陽中秋

秋山雨過露華寒讀罷莊周夢欲闌可惜故園今夜月
年來都向異鄉看

送劉毅公遊襄陽

漫將詩句動江關
春草王孫尚未還
便欲躬耕何地是
憑君好問鹿門山

春山獨客使人愁
楊柳青青送客舟
我已無家難作賦
君行莫上仲宣樓

楚客曾聞續大招
郢城南去水蕭蕭
只今宋玉墳邊月
猶照行人渡板橋

送王大愚南還

斷壘寒烟古孟津
羨君此去有垂綸
桃花野水三千尺
流到宣房問故人

寄伯建

江船無日不鳴笳
辜負揚州幾樹花
匹馬黃河歸路遠
北風吹夢到長沙

過順德有懷滄溟先生

中原二子盛當時
歷下文章晚更奇
識得峨嵋天半意
黃榆高處自題詩

領袖宗徐氣尚驕
秋生郡閣雁蕭蕭
文章未老山河在
詞客英靈正可招

石 申

申字仲生灤州人
順治三年進士
歷官戶部左
侍郎贈吏部尚書
祀鄉賢有寶笏堂遺集

李蔚序仲生氣盛才短不可一世操筆爲文幽折瑰麗都非尋常蹊徑詩劇鉅鏤剔矯岸不羣洵能自成一家言猶記初爲庶常時閣試之典未廢一日內院集試擬待漏院記諸人爭摹朱調獨仲生起語云天子無日不視朝宰相無日不入對此待漏院之所由設也余服其老成已而果第一

池北偶談

世祖皇帝恪妃石氏灤州人

戶部侍郎申之女也申父維嶽明萬歷庚戌進士官某省副使會王府中官某鳩其王反誣其妃某弒逆撫按以下皆納其賄將具獄矣維嶽獨持不可力雪妃冤至是申生恪妃竟入宮掖人以爲救妃之報云

八月二十六日西山暫歸

去去欲無還幽憂可駐顏此生貪白業不死看青山
善友能相其浮雲且自閒風塵燕市在留與鬢毛斑

送人

豈有七旬外猶然事遠征江湖兒女意鄉國友朋情衡
雁題新字江鷗識舊盟臨歧贈老淚發棹水盈盈

秋日同芝麓諸公集黑窰廠分賦

車馬紛城闕尋秋此地偏路深鐘響出臺古燒痕圓老
樹侵沙苑饑鷹獵歲田與君期盡醉休問戰爭年

宋翔

翔字子飛宛平人順治三年進士歷官按察司

俞事

魏憲百家詩鈔于飛先生督離江淮爾廉吏公
餘留心風雅不屑屑于近人之習縱筆所如意

新詞

桂林冬至

一線牽兒女愁多與夢長不知將臘至豈是爲君忙萬
里吾家遠人情客路涼梅花方破白天送歲寒香

茅店

匹馬清秋路西山日已微數聲樵牧唱一色水雲飛影
落孤村道寒侵旅客衣隔鄰彈鋏者夢與月空歸

江行雪

雨雪衡山路天涯萬里心孤舟虛冷棹殘夢壓寒衾天
濶雲遙落江空水映深歸來歌笑處驢背快長吟

閨思

假寐臥香閨朦朧何曾睡思量玉尺寒裁衣託誰寄
新月不可照深深羅帷裏纖手弄雙鉤湘簾涼如水

胡兆龍

兆龍字予袞號宛委一號具茨宛平人順治三年進士歷官吏部侍郎卒贈尙書有息遊堂詩集

十一月望

上巡畿北至天壽山觀明帝諸

陵遣官致祭仍

特命司空修葺殿宇恭

紀四十韻

神京北百里崇山峙千重駸駸亘無垠巖竄凌蒼穹
皇都實屏幃縹緲排雲峯天壽更嶢嶢鬱鬱勢何雄有
明十五帝於茲建幽宮層巒互回合皎若青芙蓉南面
豁平野洪流環西東中列萬古宅翼翼闢鴻濛朱門啟
長道豐碣陳春容華表高刺天雲雷纏蛟龍斷石備法
衛一一爭鬼工前岡森玉殿後原闕神封周垣肅丹堊
金碧輝瞳矐宮監及陵戶灑掃時虔恭維帝初踐阼展
謁禮必躬春秋肅霜露淒然思劍弓詞臣將明命孝享
摠哀恫二百八十紀盛典何雍雍王氣一朝歇神器窺
元兇大命集 昭代嗚呼天祿終陵殿晝寂寞傾圯翳

秋蓬石馬沈蔓草古瓦啼寒蟲神路藝禾黍廟伐空喬
松園果復誰薦探摘隨兒童但見棠梨花歲歲原上紅
玉衣竟惆悵蕭颯來悲風我

皇巡畿輔法駕臨

龍從顧瞻諸陵墓惻惻動

宸衷潔祀飭宗伯葺

治庀司空仍益守陵役以絕樵蘇蹤庶令千載後永識
明諸宗宏度超萬古隆軌激羣公野老亦感泣漣洏知
何從緬惟明盛時四海皆來同宏圖今安在山色徒青
葱興衰若倚伏慨焉悲填胸豈知易時代邱陵還見崇
自非

聖王世誰能德義豐臣職在珥筆感此盛

事逢作歌揚芳烈用以昭無窮

題成青壇少傅浮邱山房圖

秋風柳色青門路相國辭朝車馬去綠郊祖帳傾都來
輦下公卿餞疏傳何人畫手似當年余曾圖出灞橋烟
兒童走看父老歎道傍嘖嘖稱公賢相國掉頭意不欲
但與鋪張失知足吾家自有輞川圖浮邱之山邑城曲
浮邱秀削青芙蓉城爲匹練割南峯并城迤西稍向北
雙屏罨靄依長松入門坡陀卽山趾灌木修篁翠微裏
逕轉時時彩石逢花繁恰恰啼鶯起客到花間徑欲迷
忽有磴道淩丹梯山堂樹杪俯萬井棟牖每有烟霞棲
堂後陰岑窺洞壑乳竇嵌空產仙藥深入藤蘿互蔽虧

旁穿日月相迴薄因登絕頂翼飛軒蟠空已是浮邱巔
去天尺五帝座逼下視一氣何蒼然大伾東拱青壇矗
黎陽黑山皆隱伏西南長河來萬里銀漢奔流吞大陸
百泉衛水清漣漪影出沒飛虹霓春花秋月堪高臥
雨澗晴嵐亦總宜別有層樓連石室神仙好之中晏息
架頭寶笈但藏書花下玉缸時釀秫更循山背臺館多
碧溪宛宛紅橋過清照亭前千个竹歸雲閣外半池荷
綠葵黃菊兼松韭奇木珍禽無不有自言出山十八春
但喜圖成常在手泰階已平玉燭調必世正是成康朝
卽非黃髮歸亦得或恐赤松來相要我披此圖神欲往

臥病況復疎塵鞅閒居苦在洛陽陌從公便作濠梁想
只愁蠟屐向東山旋爲蒼生捉鼻還暫至翻增猿鶴怨
讓余偃蹇附朝班

春盡不得雨

倚徙春還盡炎風又匝旬旱雲橫白日落照慘黃塵關
隴災仍急東南斂轉頻安危非一事能不愧垂紳

從獵聞寇警

滇池師未息陽谷海仍波節鉞人安在樓船將已多五
雲開玉帳萬里洗銀河薄伐勞

神武登壇意若

何

午門宣捷音志喜

數載勤宵旰戈船未寢兵人頻占太白天亦厭櫓槍百
戰熊羆氣千家鴻雁聲遙知大酺飲先釀石頭城

過內閣登遼后妝樓觀新建白塔

春水初融太液池芙蓉紫苑漾新澌林烟翠幌凝眉黛
花露金溝學口脂異代青霄多寶涌歸魂白月散香遲
恩深待放三千女不唱同心別院詞

梁清寬

清寬字敷五正定人順治三年進士歷官吏部

左侍郎

百家詩鈔田孝廉髯淵高言集極稱數五爲燕
趙巨擘先生詩以厚爲主氣厚則靜意厚則實
詞厚則典淨與
纖者不得託焉

題夢園

鼓子城隅錦沙陌小築薜蘿有幽客白雲峯下碧溪頭
寂寞楊公高談宅半山半市儘避喧一詩一酒一卷石
松風拂簷石牀靜竹籬短垣追陶令綠蔭繞屋蒔苗衣
清吟長嘯世無競逸蹤願作鹿裘人支頤冷眼向簪紳
閒把道書尋丹訣絕勝長安溷緇塵山中鎮日數棋局
那知仕路已翻新惟此清風樛木閣今古醉倒殘花臥
湘浦有時蕉葉代箋題湖光鳥語紛捐組歸來不用買

山錢披襟烟月常作主吾將爲先生頌冥鴻之孤高且
願書左徒之離騷朝攀木蘭夕宿莽英雄咄咄笑蓬蒿
倦來枕上日高睡悲歌慷慨震雲濤君不見功成已從
赤松翔五湖早有大夫航世上浮名眞糝糠蒹葭伊人
天一方

贈于丈

金山孤插鬱籠蔥瘦嘯高峯獨有公不須陶潛賦歸去
一邱一壑伴烟樹富貴軒冕安足論志切湖海踏崑崙
雲物蒼茫堪深隱著書時闔陸羽門羨君丹素常滿案
含咀應劉霞色爛兼之學道陋世筌穆穆孝友相蟬聯

元將洵可號鳳毛一經競道韋公高草堂知己惟林山
怡然自覺心事閒絳縣安識幾甲子今來但有冰霜顏
俛仰人世易彫朽北固江濤在窗牖隱侯自是足千秋
傲吏可把洪崖手慕君之德爲君歌雨壑風湍付綠簑
何用勞勞萬金產桓典稽古澤正遠

春日過伯棠別墅

偶過西郊日海棠紅欲然里門仍故榜茅屋枕寒泉小
飲花堪醉慵遊草借眠山中饒樂事歸路眺晴烟

野望

芳草垂楊岸茅茨十數家小橋環綠水遠岫映紅霞入

坐花迎笑開樽酒任除夕陽烟景碧漁艇出蒹葭

睡起

睡起渾無賴窮愁百事闌雲窺虛牖靜風入小牕寒拙
宦餘三徑浮名悔一官早知農圃好長嘯向烟巒

雨中嘯雲樓卽事

小雨淙淙入曉涼樓前老柏正青蒼結籬儘足安羊仲
閉戶何須問鄭莊書卷梧桐霑細潤窗紗茉莉送餘香
平生最愛尋幽處瓦鉢松醪興欲狂

入棧

雲連古棧曉寒侵嵐氣高浮盡日陰山麓結茅聊下榻

野航釀酒暫開襟千層峭壁迷樵徑百道飛泉冷客心
莫笑王陽迂濶甚鄉思永夜不成吟

保寧書懷

驅馬王程歲漸移迢迢猶未卜歸期黃牛峽口尋遺老
靑草池邊覓舊碑雁杳無情應有恨客愁抱病轉多思
鄉關欲到憚難寐步月瞻雲夜漏遲

成都故宮感懷

離離細草徧荒臺寂寞西風動客哀鴛瓦朱宮迷舊址
玉鈿翠靨委蒼苔巡簷凍雨聽如咽極目愁雲掃不開
把酒倚闌清漏永挑燈無意盡餘杯

咸陽懷古和賈司馬韻

荒城嵐氣接高秋
淡月疎雲動客愁
異代興衰同逐鹿
千年勲業等浮鷗
圖王猶自傳姜尚
策國誰能繼馬周
渭水秦關多勝蹟
驅車幾度問前邱

李二公自京師見訪扇頭有玉立弟詩以春明門

內卽村居爲題依韻和贈

春明門內卽村居
揚子雲亭好著書
雨後藝花泉釀熟
林中覓句世情疏
青蓮久屬同心友
綠野今來長者車
敢謂陳蕃能下榻
孤蹤攜手話樵漁

月夜感懷

雨後蟾光上碧梧深沈院落一輪孤隔年歲月疑今古
往日親知半有無興至愛尋高士傳愁來頻檢白雲圖
中宵萬感尋常集把酒還思碎唾壺

太行山

衰草淒淒百戰場英雄棋局等弓亡秋原漫上高峯望
極目寒烟數雁行

西郊水亭

清溪曲港小橋平繞岸荷花帶晚秔雉堞遙分秋照冷
淡烟和月急砧聲

城河

芙蓉照水影參參十里橫橋帶晚嵐秋淨漁舟紅蓼岸
鮮鱗紫莢小江南

李及秀

及秀字公愚玉田人順治三年進士歷官河南
巡按監察御史

玉田縣志及秀聰穎能文工詩善書事母以孝
聞家貧月常不給躬率家人食蔬而日必以
齋奉母登進士主政計曹荆魯之間多治
績代巡梁豫上百餘疏人避驄馬御史焉

同張明府遊楸子峪

政有餘閒整屐裾高山憑弔夕陽曛爲因秋盡枝枝悴
何處春來葉葉殷十載宦遊傷舊識百年交道惜離羣

紗籠自昔稱佳事，懶向南軒覓故文。

李鴻勳

鴻勳字勤王，號長六，磁州人。順治三年進士官

山西陽城縣知縣

楊方見磁人詩，明府性豪邁，入泮最晚。明制年二十不列于庠，服飾卽同市井，例戴瓦龐巾。子公恥，鍵戶下帷，寒暑無間。余先舊第與君鄰，每夜聞公讀書樓上，始而讀繼而哭，時或擲巾以足蹴之，其刻苦如此。年三十餘始青其衿，歸里後，陶情詩酒，多蓄古玩，字畫喜蒔花竹，常藝名菊數百本。花時邀賓流連，雅集書法，道勁跌宕，不羈。

過先賢閔子騫故里

數十間茅屋，人傳閔子家。秋風吹不斷，滿地有蘆花。

梁清遠

清遠字葵石正定人維樞子順治三年進士歷

官吏部侍郎有祓園集九卷

四庫全書提要祓園集九卷梁清遠撰是集清遠所自編凡詩四卷文四卷詞一卷其詩直抒性情頗能蟬蛻于習俗之外而人所應無盡無人所應有尙未能盡有也

夏日閒居

拙宦自寥落閉門車馬稀
石窗迎旭日淡淡發清輝
髣髴不思櫛爐香漸滿衣
背人讀道書心清無塵機
人生亦且暮胡爲苦奔波
曹務雖多端暫輟聊自嬉
瓶荷度鮮飈思我山居時
山居有幽致安得願無違

同蒼巖公白遊城南

清流貫雲木水際有人家
頽徑侵芳草疎籬冒落花
天晴霞散影野靜雁依沙
景物看如此行吟日已斜

秋懷

渾渾斜日照金臺何處啼烏帶影來
太液亂流衣帶繞西山晚翠屏開
中原豺虎增郊壘四野歸鴻戀草萊
極目關河無限思漫歌五噫有餘哀

送宋玉叔備兵秦州

鳳城風暖雪初晴遙望軺車使者行
絳帳諸生遲問字戟門小隊待談兵
擁旄曉度祁山影吹角宵連渭水聲

萬里金湯龍劍在豈徒詞賦擅西京

金肖孫

肖孫字瑞枝完縣人順治三年舉人官四川富

順縣知縣

繼輔通志肖孫御史毓嗣從子甲申毓嗣殉難賊將張洪執肖孫詰毓嗣子所在筆楚炮烙身無完膚終不言

毓嗣諸子得免

完縣志肖孫康熙戊申除富順令廉平精練富順常凋殘之後百物荒廢肖孫至官招流民修縣志捐俸以充常平開井以興鹽利建義學以育人才築城垣創縣署多所興復遠人願請受厘邑大治遘疾卒於官輟歸時民爲舁送數百里作木主祀之

紀遊

撲面飛沙積流觀眼欲迷堤長惟牧犢夜盡未鳴雞僻
店人家少隆冬曙色低逡巡驢背上緩轡過橋西

國朝綴輔詩傳卷五終